

Wakita na a puwatertaa Paul ge emnde a GALATIYA

Ga use á Paul

¹ Náwa wakita na yá anƙwa puwetá ba iya Paul ya slebela á Yaisu *Almasiihu. A givaa urimagweka slebela ɗanna, a beliyaa urimagweka, a beliyaa ba Yaisu an ire-aara tá antara Eddenjara Dadaamiya na a tsante am faya na. ² Iya, ɗá antara emnde a fetarfe na tá áhuna bademme, ɗá anƙwa á gakur use á ɗere ge kure kwa emnde a fetarfe na kwá am larde á Galatiya bademme. ³ A magarakuránmaga tara Eddemiya Dadaamiya antara Yaakadada Yaisu Almasiihu ɗgurna, a varakurteva hairire. ⁴ Yaisu Almasiihu a yaa ba shifa-aara ge enzlamise miya am haypa-aha-miya, geni a shanka adaliye duniya laakire na hakuma áte miya mazla-aara. A maganaahe á ba áte una á kataná Eddemiya Dadaamiya. ⁵ Galaumigálá Dadaamiya dem ba ge deƙideƙi. *Aamin.

Baaka labare á higa umele sey ba palle na

⁶ Yá maga ba najipu áte kure, adaba Dadaamiya a magakuraa ɗgurna á kya erva an Yaisu *Almasiihu, a gakurve emnde-aara, aley kerten eptsakuranvepts a iga, kwa cenvaa labare á higa umele. ⁷ Amá baaka labare á higa umele sey ba palle ɗanna ya balakursebale na. Ya ndanaa adaba uwe una, adaba tá anƙwa

weshakurweshwa emnde umele, tá kátá eptsante labare á higa, elva a Yaisu Almasiihu na. ⁸ Amá ma a de balakursaa ware labare á higa umele arge una ña dakurnaa ñere na wá, ma ba ñere ñanna, ma malika a sawa am samaya keni, a nyainyainvenyainye Dadaamiya edda-aara. ⁹ Ndza keni ya ndakurndaha. Kina keni yá ndakurndaha zlaḡe ádaliye: ma ware una a de balakurse labare á higa umele, gergere antara una kwa cenanaa kure, a nyainyainvenyainye Dadaamiya edda-aara.

¹⁰ Emtu kwa kurken yá tsáká una ganakini a zlebarizleba emnde emtu? Iya yá kátá á zlebiyá ba Dadaamiya. Emtu kwa kurken yá kátá haya áza emnde emtu? Máki yá kátá haya áza emnde zlaḡe ádaliye wá, yá taa gevka waladí á Yaisu Almasiihu.

*Náwa a gevaa estuwa Paul slebela á Yaisu *Almasiihu*

¹¹ Egdzar mama-aha-aaruwa, wayanwaya ge kwa diyeddiye ganakini labare á higa na ya balakursaa iya na wá, elva ñanna elva á urimagweka. ¹² Adaba a binaa urimagweka elva ñanna, a kwarisaa urimagweka, a binaa ba Yaisu an ire-aara.

¹³ Ábi kwa cenáncena nja-aaruwa werre am sarte na ya tse á ba áte nadina á ñere Yahudiya-aha. Am sarte ñanna ndza ya shateru zlaḡa kwakya ge emnde a fetarfe. Baaka názu ndza maganka ganakini yá keḡanaakeḡa elva ñanna ba ḡekideki. ¹⁴ Am jeba-aaruwa ndza ya jateruwa ba iya ge ukfe-aha-aaruwa umele ge mága názena am nadina á ñere. Dabantedaba

nade-aha na ta kwaranɗersaa eggye-aha á ɗere an ervaunɗe-aaruwa palle.

¹⁵ Dadaamiya a eksise vateneka, a eksise kwaye zlaɓe yarika, a magiya ɗgurna, a naba ɗahite geni yá gevge sleslera-aara. Samsa sarte na a wayetaa ɗane maa, ¹⁶ a naba marise Egdza-aara geni yá ɓalaterá labare-aara ge emnde na ta ɓaaka am nadina á Yahudiya-aha. Am sarte na a marise Egdza-aara ɗanna, danka ya ma ádeza ware keni ge ndava sawari. ¹⁷ Ma á dem Urusaliima keni danka ya ɗekideki ge de ndava sawari áza emnde na ta gevaa itare zunɗwe emnde a ɓela á Yaisu *Almasiihu. Ya naba tse am Dimaska ɗanna, ya naba zlala á dem haha á Arabiya. Daaci ya eptsehe zlaɓe ádaliye á dem Dimaska. ¹⁸ Ya magaa yawe keye kalkale, lauktu ya dem Urusaliima, ya de mbapse antara Piyeɗ, ya magaa ba maka buwa ázeɗara. ¹⁹ Amá puwanteka ice-aaruwa ɗekideki áte emnde a ɓela umele, sey ya naa ba Yakuba egdza emmeɗara ge Yaakadada. ²⁰ Náwa Dadaamiya, icanka fida am názena yá bakurná ya na ba palle keni.

²¹ Am tsa-aaruwa am Urusaliima, kwaye ya zlala á dem haha á Siriya, antara haha á Silikiya. ²² Am sarte ɗanna maa, zlaɓe diyarika emnde a fetarfe na tá am kwara á Yahudiya. ²³ Sey ta cenaa ba labare-aaruwa áza emnde a fetarfe umele. Ta bantsa emnde ɗanna: Edda-una ndza a shaɗeru zlaɗa werre na wá, eptsaptepsa. Kina wá, ɗane keni á aɗkwa ɓala labare á higa na ndza a kátá keɗanaakeda ba ɗekideki na.

24 Daaci ta fantau ge gálá Dadaamiya adaba slera-aaruwa.

2

Zuɗɗwire á jammeje á Paul antara emnde a bela umele

¹ Daaci ya magaa yawe kelaawa ju ufafé ágashe ɗanna, ya naba eptsá adaliye á dem Urusaliima, ɗa saa antara Barnabas, aɗkwa Titus ázeɗere. ² Eptsá-aaruwa ɗanna keni, ndza a marisaa ba Dadaamiya geni sey yá eptsá. Am saasa á ɗere ɗanna wá, ɗa magaa jahava sey ba ɗere antara male-aha á emnde a fetarfe. Daaci ya palaterse sera á labare á higa na ya balateraa ya ge emnde na ta baaka am nadina á ɗere Yahudiya-aha. Adaba má jammeka elva á ɗere antara itare, bademme á slera-aaruwa na ya maganaa ya werre, antara una ya maganaa am sarte ɗanna, ma andze a gev ba dey. ³ Titus na ɗa jaa daba kerde na wá, ɗane ura Yunaniɗkau, amá hyarareka ganakini sey ba laari á demda am shedekwe, á gevge emtsaade ura Yahudiya. ⁴ Mbatu wá, tá aɗkwa emnde na ta bantsa itare ta emnde a fetarfe, mbate fida na, am jahava á ɗere ɗanna. Ta bantsa itare wá: Sey a demda emtsaade am shedekwe. Emnde ɗanna wá, ta saɗerte á ba an ila ge se gya gyafa á ɗere. Adaba ɗá kwaraná ba ɗere ire á ɗere áte názena am nadina á ɗere Yahudiya-aha, adaba barka á Yaisu *Almasiihu. Daaci tá kátá eptsáɗerá á dem *tawraitá ɗanna zlaɓe adaliye. ⁵ Amá ɗere eksaɗeraareka elva-aatare dɗekideki ba cekwaɗgudí keni. Wayaɗerka tá

badzanvebadze labare á higa na, adfaba nanna elva a jirire, geni kure keni kwá cenvaacena jirire nanna, kwá tsaatse átekwa.

⁶ Amá emnde na ta male-aha ba itare am emnde a fetarfe na wá, ma ta male-aha, ma ta male-aha ka keni, ba duksa palle ázerwa. Adfaba Dadaamiya wá, nane á zhareka ice á ura. Am sarte na ya palateraa labare á higa na ya balateraa ge emnde na wá, male-aha nanna ndaharika geni yananseye elva am waazu-aaruwa.

⁷ Baira ta naba diyeddiye ganakini a fiyaara ba Dadaamiya slera á de balaterá labare á higa nanna ge emnde na ta baaka am nadina á nere Yahudiya-aha. Ba seke una a far ge Piyer ge de balateran ge Yahudiya-aha. ⁸ Ta naba lansauke geni ba Dadaamiya na a vantaa hakuma ge Piyer, a belanaa á dem Yahudiya-aha na wá, ba duksa palle ge iya keni, a beliyaa ba nane á dem dagave á emnde na garevka Yahudiya-aha. ⁹ Daaci ba tara Yakuba antara Piyer ira Yuhanna una, ta male-aha á emnde a fetarfe nanna, naranna itare geni ba jirire a fiyaara ba Dadaamiya slera nanna. Ta naba vite erva, ta vante ge Barnabas keni, jammeje elva á nere áte una nanna. Daaci na zluhe am sawari geni nere, ná de balaterá labare á higa ge emnde na garevka Yahudiya-aha, itare tá de balaterán ge Yahudiya-aha. ¹⁰ Elva palle ta banerna itare wá, a ba itare: Viyawateraaka talage-aha á miya áhuna. Una nanna, duksa na ni yá maganá ya keni an ndzedfa-aaruwa bademme.

Paul a valaare ge Piyer á katafke á zlamaha

¹¹ Haraare am iga á una ñanna maa, samsa Piyer á sem Antakiya, ya naba valaarehe á katafke á zlamaha, adaba magaaka duksa an unñule-aara. ¹² Adaba am zunñwire wá, ta zaa dafa ba kerde an emnde na ta baaka am nadina á ñere. Am sarte ñanna maa, Yakuba a belaa emnde á dezeńere. Ba saremsa emnde ñanna wá, mele Piyer zaaka dafa antara ñere mazla-aara. Adaba a wanaa lyawa átuge itare. Adaba itare ñarnaña nadina á ñere an tsaka ire. ¹³ Yahudiya-aha umele na fartarfe na keni, garevge an dzama ire bubuwa ba seke Piyer. Ba Barnabas an ire-aara keni gazlaagazla, a magan ba seke náza-aatare. ¹⁴ Ba ya nanna dzalaranvedzale jirire á labare á higa, a ba iya, yá elvan ge Piyer á katafke-aatare bademme: Ekka, ka ura Yahudiya, amá ka sem ba estuwa ásehuna, ka ganve ire á ña ba seke ka ura Yahudiya ka, njan̄ka áte njá á Yahudiyire. Máki ba estuwa, ká dzegwaná estara hyaterar ge emnde umele geni a njarinja áte njá á Yahudiyire?

Emnde bademme tá enzlese á ba an fetarfire

¹⁵ Nere wá, ña Yahudiya-aha miyenne. Ña emnde na baaka nadina-aatare, ña d'ahaterá an emnde a haypa na ka. ¹⁶ Amá diyañerdiya ganakini ura á shánka jirire áza Dadaamiya an d'aba *tawraitá, sey an fetarfire áte Yaisu *Almasiihu. Ba ñere keni, ña fetaare á ba áte ñane, lauktu ña shaa jirire áza Dadaamiya. Ña shanaa adaba ña d'abete tawraiteka. Baaka ura á shá jirire adaba á d'abete tawraitá. ¹⁷ Daaci kina wá, ña an̄kwa shá jirire á ñere áza

Dadaamiya an fetarfire áte Yaisu Almasiihu. An una nanna wá, n̄ere keni n̄á an haypa ba seke emnde bademme. Máki estuwa wá, amaana a sepuan̄ermaa ba Yaisu Almasiihu emtu am haypa nanna? Estuweka deki deki. ¹⁸ Amá má ya eptsarhe zlafe ádaliye, yá habaza názena ya eptsanve iga wá, yá maga duksa laake á katafke á Dadaamiya.

¹⁹ Máki áte elva á tawraita wá, iya ba seke yá an emtsa ázenara. Una keni a jiyaa ba tawraita nanna, geni yá shá shifa umele ge d̄aba Dadaamiya. Am sarte na ta zlenelaa Yaisu áte dzangala, gevge ba seke ta cebaan̄er kerde antara ya. ²⁰ Shifa na yá an nane kina na wá, shifa-aaruweka, yá n̄já an shifa á Yaisu Almasiihu. An shifa na yá n̄já an nane am duniya na wá, yá n̄já an fetarfire áte *Egdza á Dadaamiya. A wayitaa ba nane, haa a naba yaa shifa-aara ad̄aba iya. ²¹ Iya wá, ya taa yanaaka ngurna á Dadaamiya, geni sey yá d̄aba ba tawraita. Ad̄aba ma andze tá naba shansha emnde jirire áza Dadaamiya an d̄aba tawraita wá, daaci emtsa á Yaisu Almasiihu na ma andze á gev ba dey.

3

*Daba *tawraita bi fetarfire áte Yaisu *Almasiihu*

¹ Kure emnde a Galatiya wá, baaka en̄kale á kure. A kedakuraa ware estuwa? Ya palakurnaa tsa sera-aara bademme geni a emtsa estara Yaisu *Almasiihu áte dzangala. ² Ndava-aaruwa ba palle ázekure, vawiteva jawapa! Dadaamiya

a vakurte Shedekwe Cufedde; kwa shaa Shedekwe nanna adaba kwa dabete *tawraitu emtu? Emtu adaba kwa cenaa labare á higa, kwa fetaare an erwaunde á kure palle he? ³ A kedakuraa uwe estuwa áte enkale? Am fantaufe wá, kwa tsaá á ba áte hakuma á Shedekwe Cufedde, amá kina wá, kwá kátá zanaazle an ndzedá á ire á kure emtu? ⁴ Kwakya názena a maganaa Dadaamiya an sleksire-aara am dagave á kure, bademme á una-aha nanna á gev ba dey emtu? Tamanka ganakini una nanna á gev ba dey. ⁵ Dadaamiya a vakurte Shedekwe Cufedde, a magaa najipu-aha kwakya am dagave á kure. A magaa una-aha nanna adaba kwa dabete tawraitu emtu? Emtu adaba kwa cenaa labare á higa, kwa fetaare an erwaunde á kure palle he?

⁶ Yahauteyeha názena a ndanaa wakita á Dadaamiya áte Ibrahimu, a ba nane: Ibrahimu a fetaare áte Dadaamiya. Adaba una nanna a shaa jirire áza Dadaamiya. ⁷ Daaci diyaweddiye geni, bademme á emnde na fartarfe áte Dadaamiya á ba an jirire, ba itare una ta wulfe-aha á Ibrahimu. ⁸ Ndza a ndaase vateneka Dadaamiya názena a ganvaa nane kina. A ba nane am wakita-aara wá, ba emnde na garevka Yahudiya keni, tá de fetarfe áte nane. Adaba fetarfire-aatare nanna wá, á de gatervege emnde a jirire á katafke-aara. Adaba una nanna, a ndanse labare á higa nanna ge Ibrahimu emtsaade, a ba nane á elvan ge nane: Yá de ga barka áte nalgaadama bademme adaba ka. ⁹ Ibrahimu a fetaare áte Dadaamiya, daaci Dadaamiya a gan barka. Diyaweddiye ganakini bademme á emnde na ta fetaare áte

Dadaamiya, Dadaamiya á de gater barka ge itare keni.

¹⁰ Adaba bademme á emnde na ta tsaa á ba áte *tawraita, geni tá shá jirire an nane áza Dadaamiya na wá, bademme tá an nyainye áza Dadaamiya. Adaba anƙwa an puwa am wakita á Dadaamiya, a ba nane: Edda una maganaaka názena á ndaaná tawraita na bademme wá, an nyainye áza Dadaamiya. ¹¹ Baaka shaige-aara, diyamidiya ganakini baaka ura á shá jirire áza Dadaamiya an daba tawraita. Adaba anƙwa an puwa am wakita á Dadaamiya, a ba nane: Edda una a shaa jirire áza Dadaamiya an fetarfire wá, ba nane una an shifa a jirire. ¹² Tara daba tawraita an fetarfire wá, tá maslaaveka. Anƙwa an puwa am wakita á Dadaamiya, a ba nane: Edda una a tsaa á ba áte mága názena am tawraita wá, shifa keni á shaná á ba an tawraita nanna.

¹³ Amaana wá, má an nyainye áza Dadaamiya, adaba dzegwamiyánka mága názena a ndahanaa tawraita na bademme. Amá *Almasiihu a se lyamivaare nyainye nanna ge miya, a demaa nane am slede á miya. Ta puwete ba estuwa am wakita á Dadaamiya, geni máki zlenelarzlenela ura áte nafa wá, amaana an nyainye edda-aara.

¹⁴ Yaisu Almasiihu a magaa una nanna wá, geni barka na a ba Dadaamiya á elvan ge Ibrahimia á de gater ge nalgaadama bademme na wá, á gevge á kya erva an nane. Zlabe adaliye a magaa una nanna geni mí shá Shedekwe Cufedde na a ba Dadaamiya á de vamiteva má famitaarfe na.

**Tawraita á badzeka namána á Dadaamiya*

15 Egdzar mama-aha-aaruwa, cenaucena, náwa yá palakurá elva an garava á názena mí maganá miya emndimagwaha. Máki njarinja emnde buwa am haha, ta ngudáa namána wá, baaka slepekyateraapekyá, baaka slefateraarfe keni. 16 Ba duksa palle an namána á Dadaamiya keni. Werre wá, Dadaamiya a maganaa *waada ge Ibrahimia. Waada nanna a maganan ge nane antara wulfe-aara. Adaba a ba nane: Watse yá gan barka ge nalgaadama bademme á kya erva an wulfe á na. Ndahaaka wakita á Dadaamiya: á kya erva an wulfe-aha á na, amá a baa: wulfe á na. Wulfe-aara nanna wá, ba Yaisu *Almasiihu. 17 Náwa názena yá kátá bakurná ya: Duksa zunḡwe wá, Dadaamiya a maganaa waada ge Ibrahimia. A magaa yawe deremke ufade an kul keye, lauktu a vaterte *tawraitá ge Yahudiya-aha. Aley keni tawraitá nanna á badzeka názena Dadaamiya a maganaa waada-aara ge Ibrahimia werre. Tawraitá á pekyeka namána á Dadaamiya dekideki, á pekyeka názena a magateraa waada-aara ge emnde keni. 18 Amá ma andze vaterteva Dadaamiya ge emnde názena a magateraa waada-aara na adaba ta dabete tawraitá wá, daaci ma a gevka adaba namána mazla-aara. Amá Dadaamiya a gan barka ge Ibrahimia, adaba a ngudanaa namána-aara.

19 Máki estuwa, ázara dalila á *tawraitá nanna ba dekideki? Dalila á tawraitá nanna a faterara Dadaamiya ge emnde arge názena a magateraa waada-aara na wá, ba ge maraterá haypa-aha-aatare parakke. Dadaamiya a vaterte tawraitá

ɲanna ba ge sarte cekwaɲgudfi ge emnde. Ba ge ufa wulfe á Ibrahimina na a ɲgudateraa namána ge emnde bademme á kya erva an ɲane na. Ba samsa ɲane wá, baaka hakuma á tawraita mazla-aara. Tawraita wá, Dadaamiya ndza a belaa ba malika-aha an ɲane, ge saterán ge emnde. Amá ndza aɲkwa sledagave á emnde antara malika-aha ɲanna. ²⁰ Deme keni wá, sledagave wá, á tseme am dagave á emnde buwa. Amá am sarte na Dadaamiya a maganaa *waada ge Ibrahimina wá, ba ɲane antara Dadaamiya, baaka sledagave-aatare.

*Ázara dalila á *tawraita*

²¹ Una ɲanna á bánba ganakini tara *tawraita tá gyaaveka an namána á Dadaamiya emtu? Estuweka dekideki. Adaba ma andze a dzegwándzegwa tawraita vaterte shifa ge emnde wá, ma andze a dzegwándzegwa vaterte jirire keni á katafke á Dadaamiya. Amá baaka una áza tawraita. ²² Baira deme a ba wakita á Dadaamiya wá, bademme á emnde a duniya tá á ba am erva á haypa. Estuwa aɲkwa á vaterte názena a magateraa waada-aara na ge emnde adaba fetarfire áte Yaisu *Almasiihu. Á vaterte adaba fetarfire-aatare.

²³ Amá am sarte na ndza zlaɓe baaka barama ge emnde geni tá fetarfe áte Yaisu wá, ndza a kwaramiyaa ba tawraita, dem sarte na Dadaamiya a weramitaa barama á fetarfire. ²⁴ Una ba estuwa, ndza a giyamiyaa ba tawraita sem sarte na samsa Yaisu Almasiihu. Daaci

shamiyánsha jirire áza Dadaamiya adaba fami-tarfe. ²⁵ Daaci kina wá, sarte á fetarfire áte Yaisu Almasiihu; á giyamiyá tawraita ka mazla-aara.

²⁶ Bademmire á kure kwa ba egdzara á Dadaamiya adaba gakurevge palle antara Yaisu Almasiihu an fetarfire á kure áte nane. ²⁷ Bademmire á kure kwa emnde na magarakuránmaga baptisma an zhera á Yaisu Almasiihu na wá, kina wá, kwa de eksa ba Yaisu Almasiihu an ire-aara. ²⁸ Mazla-aara wá, baaka gergerire am dagave á Yahudiya-aha antara emnde a jeba umele bademme. Baaka gergerire am dagave á nave-aha antara emnde na tá kwaraná itare ire-aatare. Baaka gergerire am dagave á zhele an mukse. Bademme á kure kwa ba palle adaba kwa emnde a Yaisu Almasiihu. ²⁹ Zlabe adaliye máki kure gakurevge kwa emnde á Yaisu Almasiihu wá, daaci kure keni kwa wulfe-aha á Ibrahimia. Daaci kwá de shaná ba kure názena Dadaamiya a maganaa waada-aara ge Ibrahimia antara wulfe-aha-aara na.

4

¹ Amaana elva nanna wá, egdzere wá, á de zaná ba nane tsa waráta á há á eddenjara bademme, amá am sarte na zlabe egdzere wá, tá kwaraná ba emnde ba seke nave. ² Am sarte na zlabe egdzere wá, tá fanuwa ba emnde hyema, tá giyaná ba itare, á cená ba náza-aatare, dem sarte na má banba eddenjara nane keni hyephye ura. ³ Ba duksa palle ge miya keni. Am sarte na zlabe ma ba seke egdzara wá, ndza tá kwarámiya ba jini-aha á shaitaine. ⁴ Daada áte sarte na a tsanaa Dadaamiya, a naba belaa

Egdza-aara á sem duniya, a se yanaa ba mukse, ta yanaa á ba am *tawraitá nanna, ⁵ geni a varsevare emnde na á kwaraterá tawraitá, á gamivege egdzara á Dadaamiya.

⁶ Kure wá, kwa ba egdzara á Dadaamiya. Adaba una nanna a vakurte Shedekwe á Egdza-aara anjwa am kure. Máki kwá dfaa Dadaamiya an Dada á dfaa ba Shedekwe-aara nanna á kyá an we á kure. ⁷ Bademmire á kure kwa nave-aha ka mazla-aara, kwa egdzara á Dadaamiya. Máki kwa egdzara-aara wá, bademme á názena am huđe á há-aara ba náza á kure.

Názena á kataná Paul áza emnde a fetarfe

⁸ Werre am sarte na diyakurka Dadaamiya wá, ndza kwa nave-aha á dadaamiya-aha á fida gergere kwakya. ⁹ Amá kina wá, diyakurdiya Dadaamiya á jirire, baira dfeme kwá an diya áza Dadaamiya. Kwá eptsaná estara zlađe adaliye ire á kure ádeza jini-aha á laakire nanna, baaka nampire-aatare na? Labara kwá kátá gev nave-aha-aatare zlađe adaliye? ¹⁰ Ya ndaanaa adaba uwe una? Adaba kure kwá dzámá ba muñri-aha, hare-aha á umele, tere-aha á umele, lauktu-aha á umele, ira sakanderi-aha bademme. ¹¹ Yá dzámá ire jipu, yá kuvá geni slera-aaruwa na ya maganaa ya am dagave á kure na a gevka dey.

¹² Ate elva á *tawraitá wá, taslawá á kure gawevge ba seke iya, egdzar mama-aha-aaruwa. Adaba iya, ya ura Yahudiya, amá ganevge ba seke kure. Sem vatena keni zlađe baaka emtanjire na kwa magitaa kure d'ekid'eki.

¹³ Diyakurdiya ba kure keni zunñwire á labare

á higa na ya de vakurtaa ya wá, ndza a ñiyaa ba lapikere am ekse á kure, lauktu ya magakuraa waazu ñanna. ¹⁴ Ge jirire wá, ndza shakurushe zlaɗa arge iya am lapikere-aaruwa ñanna. Amá yakurika, zharakurika seke ura dey. Baira ðeme lyakurivalya ba seke ya malika á Dadaamiya, ba seke ya Yaisu *Almasiihu an ire-aara. ¹⁵ Am sarte ñanna wá, ndza kwakya higa á kure. A jaara uwe an higa á kure kina? Am sarte ñanna wá, diyandiya geni ma andze kwá dzegwándzegwa wá, ba ice á kure keni, ma kwá sansese, kwá viteva. ¹⁶ Kina wá, kwá eksiya áte kelaadire mazla-aara, aɗaba ya bakuraa jirire emtu?

¹⁷ Diyandiya ganakini tá aɗkwa emnde na tá badakurbada geni kwá ɗaba ba itare an eɗkale á kure baɗemme, amá ganakini kwá shá shifa ka. Tá kátá ba tegakuraahe an ya zlauzle. ¹⁸ Máki an unɗule-aara wá, shagera jipu geni tá wayavewayaya emnde am dagave-aatare. Amá iya keni, a yiyaaka ervaunɗe á kure, ma yá aɗkwa am dagave á kure, ma ya baaka am dagave á kure keni. ¹⁹ Iya wá, zlaɓe yá shá ba zlaɗa aɗaba kure egdzara-aaruwa. Ya ba seke mukse na am zlaɗa á ya egdzere. Lauktu á zlauzle zlaɗa-aaruwa wá, sey má njánja Yaisu *Almasiihu am kure ba shagera. ²⁰ Kina wá, ervaunɗe-aaruwa á kátá ma ba ya am dagave á kure, lauktu ma yá shantaushe ge názena yá bakurná ya. Aɗaba kina na wá, an wesha ire-aaruwa jipu.

Tara Hajara an Saraatu ta garava-aha á namána gergere buwa

21 Ekkure emnde na kwa bantsa kure kwá kátá á kwarakurá *tawraitá na, cenakuránka názena a ndahanaa tawraitá emtu? Vawiteva emtsaade jawapa? 22 Ankwa an puwa am wakita á Dadaamiya wá, a ba nane wá, Ibrahimá ndza a shaa egdzara buwa. Egdzere palle a yanaa an kwatena, palle-aara a yanaa an mukse-aara. 23 Egdza á kwatena na wá, ta yan ba seke emnde bademme. Amá mukse-aara wá, a yan estuweka náza-aara. Dadaamiya ndza a maganaa *waada-aara ge Ibrahimá geni watse á shá egdze nanna. 24 Ankwa názu á baminá elva nanna. Nwasha buwa nanna, tara Hajara an Saraatu na keni, tá maramiyá namána-aha gergere buwa a ngudanaa Dadaamiya. Hajara wá, nane kwatena, á maramiyá namána na a ngudanaa Dadaamiya áte ire á wa Sina. Nane a yayaa egdzara-aara am navire. 25 Adaba Hajara wá, nane gevge ba seke wa Sina am haha Arabiya. Adaliye nane gevge ba seke berni á Urusaliima vatena. Adaba bademme á emnde na tá am hude-aara, ta ba nave-aha á tawraitá. 26 Mukse á há wá, nane gevge ba seke Urusaliima á jirire na am samaya na. Á kwaraná ba nane ire-aara, nane una emmemiya ge miya. 27 Adaba ankwa an puwa am wakita á Dadaamiya, a ba nane:

Ekka mukse dziire na yanka egdzere dekideki, tapakanaaka zladá á yá egdzere dekideki na, kina wá, ehiga an ervaunde á na bademme. Adaba mukse á keliya wá, tá hwiya ba egdzara-aara arge egdzara á mukse á nawiya.

²⁸ Adaba una ḡanna kure keni yarakursiye ge buwire, gakurevge ba egdzara á Dadaamiya egdzar mama-aha-aaruwa. Adaba a tsanaa ba estuwa Dadaamiya am waada-aara. Werre keni ndza a maganaa waada-aara ba estuwa ge Ibrahimima geni á de shá Isiyaaku. ²⁹ Am zamana á Ibrahimima werre ḡanna wá, egdze na a yanaa Hajara ba seke náza á emnde bademme na, a faa zlaḡa áte egdze na a yanaa Saraatu an hakuma á Shedekwe Cudede na. Am dagave á miya vatena keni ba duksa palle. ³⁰ Amá ázara a ba wakita á Dadaamiya? A ba ḡane: Ngyainsenḡye mukse á kwatena na, a ezslálá an egdza-aara. Adaba egdza á kwatena á taa fetka erva-aara áte waráta á eddenara, sey á záná ba egdza á mukse á há. ³¹ Adaba una ḡanna egdzar mama-aha-aaruwa, miya wá, ma egdzara á mukse á kwatena ka, ma egdzara á mukse á há na a kwaranaa ba ḡane ire-aara na.

5

Eptsauka á dem navire ḡekideki, kwarauk-wara ba kure ire á kure

¹ Yaisu *Almasiihu a enḡlamise am *tawraitá wá, geni mí kwaraná ba miya ire á miya. Adaba una ḡanna, tsawaatse ba shagera, a eptsaraku-raaka zlaḡe adaliye á dem navire.

² Náwa názu yá bakurná iya Paul: Máki ek-sakuraarekse geni tá puwakurá á dem shedekwe wá, baaka názena kwá shaná kure am elva á Yaisu Almasiihu ḡekideki. ³ Náwa yá ndakurndá, ma a de demá ware á kure am shedekwe ḡanna keni, famfa ire-aara am laarire,

sey a maganaamaga edda-aara názu am tawraitá bademme. ⁴ Kure emnde na kwa bantsa kure, kwá shá jirire áza Dadaamiya an d̄aba tawraitá na wá, tegakurevtege antara Yaisu Almasiihu, eptsakuranveptsá iga ge ngurna á Dadaamiya. ⁵ Amá ñere wá, fan̄ertefa tama á ñere áte Dadaamiya ganakini watse á van̄erte jirire adaba fan̄ertarfe, adaba duksa umeleka. Una názena ñá ufáná ñere an ndzedá na á van̄erte Shedekwe Cufed̄de. ⁶ Máki gamiyevge palle antara Yaisu Almasiihu wá, ma damiyemda am shedekwe, ma damiyemka keni ba duksa palle. Duksa yaikke wá, ba fetarfire. Amá wá, a naranna emnde fetarfire á miya. Una ñanna slera á wayavire.

⁷ Am zun̄wire ndza shagera zláála á kure. Á, salikataliya na wá, shagerka zláála á kure. A piyakurtaa ware ge mága jirire? ⁸ Edda-aara ba fida-aara, a belanaa Dadaamiya na a d̄akurd̄faha na ka. ⁹ Una ba jire, egdza shahi á makala ba cekwaangud̄i á tsantetse ukpa na an wasla bademme. ¹⁰ Ad̄aba barka á Yaakadada wá, fantarfe an kure á ba an jirire, geni á de geraavka elva á miya. Amá edda una an̄kwa á weshakurweshá ñanna wá, ma ware edda-aara keni, á de ñezleka am shairiya á Dadaamiya.

¹¹ Egdzar mama-aha-aaruwa, iya wá, ya yán vateneka balaterá elva a dem shedekwe ge emnde, geni tá shá jirire an ñane áza Dadaamiya. Ma andze yá bálá ba una ñanna sem vatena wá, ma tá feka Yahudiya-aha zladá áte ya mazla-aara. Daaci elva a emtsa á Yaisu *Almasiihu áte dzan̄gala na keni, ma andze á taa yanaaka

ervaunɗe-aatare. ¹² Emnde ɗanna tá weshakurweshana wá, a datsaraadátsá kwa náza-aatare bademme, a garevge nadima-aha.

¹³ Daaci egdzar mama-aha-aaruwa, kure wá, a dʒhakurtaa ba Dadaamiya, geni kwá kwaraná ba kure ire á kure. Am kwara ire á kure ɗanna maa, magauka názena á kataná ire á kure bademme. Arge una ɗanna wá, ma ware keni a maganánmaga duksa ge ura an wayavire.

¹⁴ Adaba shairiya-aha-aara bademme jammeje am shairiya palle, a ba ɗane: Ewwáya sleriya á ɗa ba seke ire á ɗa. ¹⁵ Amá má kwá dagala am dagave á kure, kwá wawa vuwa á kure an slare ba seke dabba-aha á kaamba wá, faufa kwa hyema, keɗawanaaka shifa á kure bademme.

Yawanya a tedakurteda ba Shedekwe Cudedde

¹⁶ Názena yá bakurná iya na wá, yawanya a tedakurteda ba Shedekwe Cudedde. Magauka názena ni á kataná ba ire á kure. ¹⁷ Adaba názena á kataná ire á urimagwe wá, tá gyaaveka antara náza á Shedekwe Cudedde. Názena á kataná Shedekwe Cudedde keni tá gyaaveka antara una á kataná ire á urimagwe. Duksa-aha buwa ɗanna wá, tá jammeka dekiɗeki. Daaci kwá taa maganaaka názena ni á kataná ba ire á kure. ¹⁸ Daaci má á tedaakurá Shedekwe Cudedde wá, kwa baaka am erva á *tawraitamazla-aara.

¹⁹ Bademme á názena á kataná ire á urimagwe á ba áte parakkire. Duksa-aha ɗanna ba tara gwardzire, dakarire, zawarire, ²⁰ kyula hele, mága namselkwa, mága kelaadire, dagala,

shelha, ica ervaunḡe, gardfire, tega ye á emnde, antara mága gergerire am dagave á emnde. ²¹ Zlabe ádaliye, danḡwire antara gev slembazla ira mága slakwatsire. Anḡkwa zlaḡe ádaliye jeba á duksa-aha ḡanna kwakya á kataná ire á urimagwe. Ba seke una ya ndakurndaha na, yá fakuremfe zlaḡe ádaliye am vuwa, bademme á emnde na tá maga ba jeba á duksa-aha ḡanna, tá shánka á dem zlanna á Dadaamiya ḡekideki.

²² Amá nampire á slerá á Shedekwe Cudedḡe wá, tara wayavire, higa, hairire, farvaunḡe, zezarzure, magḡwire, dzayyire á ervaunḡe, ²³ kemaarire ira tá kwarukware vuwa-aatare. Bademme á duksa-aha ḡanna wá, piyaaka shairiya á Dadaamiya. ²⁴ Emnde á Yaisu *Almasi-ihu wá, ceḡaarceba sunu-aatare bademme áte dzaḡala, baaka am itare mazla-aara.

²⁵ Ba Shedekwe Cudedḡe una slevamite shifa. Daaci yaumiyányá á tadamitádá ba ḡane palle.

²⁶ Yaumiyányá gálá ire, tatayaumika dagala an emnde, shelaumika keni.

6

Melawanumele ge ire á kure ge sepa gwatama-aha á kure

¹ Ya ndaa ba kure egdzar mama-aha-aaruwa, máki kwá nanna dzalevdzale palle á kure á dem haypa wá, kure na kwá an Shedekwe á Dadaamiya na wá, naba melawanumele, ept-sawanaaptsa zlaḡe ádaliye ásete barama. Amá wá, magauka an ervaunḡe. Daaci ma ware á kure keni, a effa hyema geni a demka ḡane keni á dem huḡe-aara. ² Melawanumele ge ire á kure ge

sepa gwatama-aha á kure. Má kwá anƙwa maga una ɲanna wá, kwá anƙwa maga názena a faku-raara Yaisu *Almasiihu am shairiya-aara. ³ Má ura anƙwa slaslaná am ervaunƙe-aara ganakini ɲane hyephye am duksa, mbate keni hyepka ba názara keni, an una ɲanna á keƙanáy ba ɲane ire-aara. ⁴ Daaci ma ware keni a zharanaazhárá názu am zláála-ava-aara, máki shagera slera-aara, a vante higa ba ge ɲane, amá aƙaba a jateru ge emnde umeleka. ⁵ Aƙaba ma ware keni á ba an názena a faraa Dadaamiya ge ɲane.

⁶ Edda una á tsaha elva á Dadaamiya wá, a tegansetege názu am erva-aara baƙemme, a vanteva ge malum-aara keni.

⁷ Diyaweddiye ba shagera geni ura á dzegwánka á zlerma Dadaamiya. Baƙemme á názena ni a jemaa edda-aara am haha, á de sháy ba una ɲanna. ⁸ Edda una á maga ba názena á katanáy ire-aara, á de sháy ba emtsa. Amá edda una á maga ba názena á katanáy Shedefekwe á Dadaamiya wá, ɲane á de sháy shifa na á zleka na. ⁹ Yaumiyánka mága maggwire. Aƙaba má samsa laukte-aara, zlaƙe yamiyánka wá, mí de shánsha nampire-aara. ¹⁰ Aƙaba una ɲanna, vacitu má njaanja slera á mága maggwire á katafke á miya wá, magaumimága una ɲanna áte emnde baƙemme. Baaka ƙeme seke emnde na fartarfe.

Halavuwa á elva

¹¹ Náwa una wá, yá anƙwa puwetáy ba iya an erva-aaruwa, yá anƙwa puwan ba yaikyaike. ¹² Emnde na tá kátáy hyakuraare á ba áte laarire, geni sey kwá demda am shedefekwe na wá, tá

kátá haya á ba áza emnde. Una ñanna tá magan ba geni a shaterka zlada má tá maga waazu áte emtsa á Yaisu *Almasiihu áte dzaŋgala.

¹³ Adaba ba emnde na tá am shedekwe ñanna keni, ñarnaaka názena am *tawraita bademme. Tá kátá puwakurá am shedekwe, ba geni tá gálá ire an kure, adaba kwá aŋkwa dabaterdába.

¹⁴ Amá iya wá, yá galaná á ba áte emtsa á Yaisu Almasiihu palle ire-aaruwa. Adaba emtsa-aara áte dzaŋgala ñanna wá, kazlaŋa á duniya gevge ba seke emtsa á katafke-aaruwa, iya keni, ganevge ba seke emtsa á katafke á kazlaŋa á duniya.

¹⁵ Adaba áte barama á Yaisu Almasiihu wá, ma damda edda-aara am shedekwe, ma damka keni, ba duksa palle. Duksa yaikke wá, ba gev ura aŋwaslire. ¹⁶ Bademme á emnde na ni tá njá á ba áte una ñanna wá, ba itare una ta emnde á Dadaamiya an jirire. Dadaamiya a zatervarze, a vaterteva hairire.

¹⁷ Fetu vatena, edda-aara a siyanka fitenire na mazla-aara. Adaba ververe-aha na áte iya na wá, á maraná ba una ñanna ganakini iya wá, ganevge ya náza á Yaisu.

¹⁸ Egdzar mama-aha-aaruwa, a magakuránmaga Yaakadada Yaisu Almasiihu ñgurna-aara ge kure bademme. *Aamin.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d